

PARTORDING NI PARMINGGUON
MINGGU XXVI DUNG TRINITATIS UJUNG TAON PARHURIAON
PARNINGOTAN DI ANGKA NAUNG MONDING

📖 Ev: Daniel 7 : 9 - 14

📖 Ep: Pangungkapon 11 : 15 - 19

TOPIK : Ro Di Salelenglelengna Do Pamarentaon Dohot Harajaon Ni Debata

1. JOUJOU TU PARSAORAN :

U : Huria na hinaholongan ni Tuhan Jesus Kristus. Nunga sahat hita di Minggu Ujung taon Parhuriaon jala Parningotan di angka naung monding. Dipasunggulhon Minggu on do tu hita Mementomori, lapatanna: Ingot ari hamamatem! Domu tusi, hami parhalado pasahathon tabe tu hamu saluhutna: "Selamat ari Minggu ma di hamu saluhutna".

H : Selamat ari Minggu ma nang di hamu parhalado nami!

U : Martiti be do saluhutna, tabolus do ragam ni angka na masa di hasiangan on, laos tahlala do laho salpu do hape saluhutna i, alai tahirim do banua ginjang inganan na hot ro di salelenglelengna. Marhite topik Minggu sadari on, "Ro di salelenglelengna do pamarentaon dohot harajaon ni Debata"

H : Mauliate madi Debata Parasi roha i naung paradehon inganan na imbaru di hita.

U : Antong bongot ma hita tu parsaoran na badia, tapuji jala tapasangap ma Debata, **marende ma hita.**

2. Marende BE. HKBP No. 6 : 1 - 2, 5 "PUJI JAHOWA NA SANGAP " BL. 56

♫♫ *Puji Jahowa na sangap huhut marmulia;
Hamu sude na parroha na ringgas na ria
Marpungu be, marolopolop sude; Hamu sude manisia.*
♫♫ *Puji Jahowa Sigomgom sude parluhutan
Na manogihon ho songon niiring ni tangan
Dohot hosam, songon hombar tu roham; Sai diramoti Ibana.*
♫♫ *Puji Jahowa tondingku pasangap goarNa
Dohot sude na marhosa mamuji Ibana
I do ture baenon ni hita sude
Sai taendehon ma Amen.*

3. VOTUM - INTROITUS - TANGIANG:

U: Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumompa langit dohot tano on. **Amen.** Songon duhutduhut do saluhut daging jala songon bungabunga ni duhutduhut i do saluhut hasangapon ni jolma. Nunga malos duhutduhut i jala nunga malos bungabunga i, alai na hot do Hata ni Tuhan i ro di saleleng ni lelengna. Sai burju ma ho rasi rasa mate, dung i lehononKu ma tu ho tumpal hangoluan. **Haleluya!**

H: (Mangendehon): ♫♫ *Haleluya... Haleluya... Haleluya.*

U: Martangiang ma hita!

Ale Tuhan Yesus, Tuhan ni angka na mate dohot angka na mangolu! Ho do nampuna hami, manang mangolu manang mate pe hami. Nangpe mardalan hami di rura nilinggoman ni hamatean, ndang huhabiari hami be hamatean, ai Ho dongannami. Ndang tartiop hamatean manang tanoman be hami, ai Ho do Tuhannami naung humophop hami, jala Ho nampuna hami. Ro hami nuaeng tu Ho mangido: sahat tu Ho ma tondinami dohot dagingnami, asa di Ho hami manang na mangolu manang na mate pe. Sai tiop ma tangannami, urupi hami marhitehite panghophopMi, asa sahat hami tu hangpoluan na so ra suda. Amen.

3. Marende BE. HKBP No.267: 5-6 “O TUHAN SULINGKIT MA AU ” BL. 100

*♫♫♫ Dipuji rohangku do Ho, o Jesus donganhu tutu
Gogongku sambing nama Ho
Pinuji rMu, pinuji GoarMu, hupuji burju
Pinuji GoarMu, pinuji GoarMu, hupuji burju.
♫♫♫ Tu Ho o Tuhanku au lao, dung suda bohalhu dison
Pargogo, parbasa do Ho
Ramoti, dongani, urupi ma hami, sai togu au on
Ramoti, dongani, urupi ma hami, sai togu au on.*

5. PATIK:

U: Tangihon hamu (Tatangihon) ma Patik ni Debata di Minggu Ujung Taon Parhuriaon dohot Parningotan di angka naung monding, sadari on i ma **Konfessi HKBP Bindu 15 “PARNINGOTAN DI NA MONDING”**

Tahaporseai jala tahatindanghon do: Hamatean i, i ma ujung ni ngolu ni jolma di portibi on, maradian ma ibana sian sandok ulaonna. Adong haluaon di angka na porsea paboa Jesus Kristus naung hehe i do panguluhon jolma i sian na mate, Ibana do Tuhan ni na mangolu dohot na mate (Rom 14: 7 - 9). Martua do na mate di bagasan Tuhan i na satia ro di ujungna (Pangk. 14: 13).

Dipatupa Huria i do parningotan di angka na monding laho padungohon haporseaonta marningot ajalta sandiri huhut padohothon panghirimon di hamonangan ni Kristus manaluhon hamatean, songon i nang panghirimon di banua ginjang sambulo ni tondinta dohot di hadodomu ni na porsea i dohot Tuhan Debata sahat tu na ro Jesus Kristus paduahalihon.

Marhite poda on: Taondolhon do panghirimon di haluaon ni jolma sian angka na mate di bagasan Jesus Kristus. Taalo do pingkiran na mandok boi na mangolu manjalo pasupasu sian na mate. Taalo do pingkiran na mandok paboa na adong pardomuan ni na mate dohot na mangolu, marhite tangiang (mendoakan arwah-arwah). Taalo do pingkiran na mandok ingkon pajongjong

tugu laho pasangaphon na monding, dalan pangalapan pasupasu tu pinomparna.

Jala marhite poda on: Tatulak do sude rumang ni na pinodahon ni ugamo hasipelebeguon lumobi poda taringot tu tondi na mandok : tading do tondi ni na mate i, jala tondi ni na mate i gabe begu dohot sumangot.

Di parningotan di na monding siparateatehononhon do mandok mauliate tu Debata di na marningot ulaon na denggan uju di ngoluna, alai ndang na mangigil pasupasu dohot tanda siarsiaran sian naung monding i.

I do sahatna. Antong, rap mangido gogo ma hita sian Tuhan Debata!

U+H: Ale Tuhan Debata sai pargogoi ma hami mangulahon na hombar tu PatikMi. Amen.

6. Marende BE. HKBP No.432:1 - 2 “SIAN HURUNGAN NI DOSANGKI” BL. 292

*Sian hurungan ni dosangki, ro au tu Ho, ro au tu Ho
Tu haluaon di mudarMi, Jesus au ro tu Ho
Nasa rohangku malum hipas, gabe mamora nang pe pogos
Sian jeangku ro au tu Ho, Jesus au ro tu Ho.*

----- Jongjong -----

*Sian ilangku nang ramunhi, ro au tu Ho, ro au tu Ho
Gabe na ias nang rohangki, Jesus, au ro tu Ho
Sian holsongku tu sonangMi, sian runduthu tu dameMi
Sian arsakhu tu holongMi, Jesus, au ro tu Ho.*

7. MANOPOTI DOSA :

U: Tatopotu ma dosanta martangiang ma hita! Ale Tuhan Debata, Amanami Parasiroha na sumurung. Na pungu do hami di joloM, martangiang tu Ho; ndada mangasahon hatigorannami, na mangasahon asi ni rohaM na godang i do. Sai asi marohaM mida sandok bangsonami, sesa ma dosanami saluhutna. Sai sungguli ma rohanami, asa muba roha dohot pangalahonami, ala ni Tuhan Jesus Kristus Tuhannami, Sipangolu hami. Amen.

Bagabaga ni Debata taringot tu hasesaan ni dosa!

Humophop hita, gabe dosa do Ibana na so tumanda dosa dibahen Debata, asa gabe hatigoran ni Debata hita, marhitehite Ibana. Hasangapon ma di Debata na di ginjang!

U+H: Amen.

(Hundul)

8. Marende BE. HKBP No. 575 : 1 “PUJI MA DEBATA NA SONGKAL” BL. 575

*Puji ma Debata na songkal, pasangap ma goarNa
Puji ma, angka rura dohot lung, angka dolok na timbo*

*Dohot hasak ni galumbang sude mamuji Ho
 Langit i na mansai hembang, bintang i na mansai torang
 Ombun i na mansai saksak, pasangaphon Ho o Debata
 Tung so olo tading au lao mamuji Ho Tuhan
 Nasa gogo bahenonhu lao pasangaphon Ho
 Ro di ujung ni ngolungku sai pujionhu Ho.*

9. EPISTEL:

U: Tangihon hamu (Tatangihon) ma Hata ni Debata turpuk Epistel di Mingguntan sadari on, tarsurat di **Pangungkapon 11 : 15 - 19**. Dung i dipalu surusuruan na papituhon ma sarunena; jadi masa ma soara na gogo di banua ginjang, angka dipandok: ***"Nunga sahat tu Tuhanta i dohot tu KristusNa i harajaon ni hasiangan on; bangkit Raja ma Ibana ro di salelenglelengna."***

H: *Ia sintua na dua pulu opat na di adopan ni Debata, angka na masihunduli habangsana be dipatungkap ma bohinasida huhut disomba ma Debata.*

U: Ninna nasida ma: "Na mandok mauiliate do hami tu Ho, ale Tuhan Debata, sigomgom saluhutna, na mangolu nuaeng nang na jolo, ala naung dialithon Ho hagogoonMu na balga i, jala ala naung bangkit Raja Ho."

H: *Nunga tarrimas angka bangso, gabe ro ma rimasMu, dapot ma tingki ni angka naung mate asa niuhuman, huhut mangalehon upa tu angka naposoM, i ma angka panurirang i dohot angka na badia, angka na manghabiari goarMu, angka na metmet ro di angka na balga, huhut mangago angka na mangago tano i.*

U: Dung i tarungkap ma joro ni Debata na di banua ginjang i, gabe tarida ma poti parpadananNa di joroNa i, jadi masa ma angka hilap dohot soara, ronggur dohot lalo, nang ambolas na balga.

I do sahatna. Martua do angka na tumangihon Hata ni Debata jala na umpeopsa.

U+H: **Amen.**

10. Marende BE. HKBP No. 522 : 1 + 3 "SURGOI SAMBULONTA DO I" BL. 359

*Surgo i sambulonta do i, ndang adong be siaeon disi
 Na mamuji tongtong na disi, pinaluani Tuhanta i
 Surgo i, surgo i, ndang adong be siaeon disi
 Surgo i, surgo i, surgo i, ndang adong be siaeon disi.
 ----- Jongjong -----*

*Na manghirim rohangku dison, paima sahat tusi nang au on
 Taiti au ale Tuhan tusi, asa rap dohot Ho au disi
 Surgo i, surgo i, ndang adong be siaeon disi
 Surgo i, surgo i, surgo i, ndang adong be siaeon disi.*

11. MANGHATINDANGHON HAPORSEASON:

U: Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok!

H: **Ahu porsea di Debata Jahowa.... d.u** (Hundul)

12. KOOR

13. TINGTING :

14. KOOR

15. PARNINGOTAN DI ANGKA NAUNG MONDING

Pdt: Nuaeng, sahat ma hita tu parningotan ni angka naung monding sian tongatonga ni hurianta sataon parhuriaon ima sian 26 November 2023 sahat tu 24 November 2024. **Marende ma hita!**

H: **MarendeBE.No. 520 : 1 "Partangisan do hape"**

*Partangisan do hape anggo hasiangan on
Holso, arsak, sahit pe, sai manosak do tongtong
Ingkon songgop hamatean tu sudena jolma i
Ai sude do na manean uhum ala dosa i.*

Pdt: Hamu angka dongan sahaporseaon di bagasan Goar ni Tuhanta Jesus Kristus. Sadari on, ingotonta do angka donganta naung jumolo monding sian tongatonganta di bagasan sataon parhuria on. Ndang na mangarungkari lungun manang sidangolon hita nuaeng disi. Ai tapatupa pe parningotan di angka naung monding i, na paingothon hita do i, paboa hita pe monding do muse songon donganta naung monding i, jala tahaporseai do, ndada hamatean ujung ni pardalananta, tung dalan hangoluan do i. Songon nidok ni Apostel Paulus tu huria Korintus: "*Ai apala Tuhan i ma na tuat sogot sian banua ginjang, mardongan soara ni sintua ni surusuruan ni Debata, dohot mardongan sarune ni Debata, dung i, hehe ma jumolo angka na mate, angka na marhitehite Kristus*". **Marende ma hita!**

H: **Marende BE. 525 : 1 "NA LAHO MA AU" BL. 361**

*Na laho ma au tu na sonang di ginjang
Di surgo tutu sai na sonang ma au.
O, ho donganki, na gok dosa, gok arsak,
Sai dohot ma ho, sai tu surgo ma lao.
Sai ro dohot ho, dohot ho, dohot ho
Sai dohot ma ho, sai tu surgo ma lao.*

Pdt: Angka on ma goar-goar ni ruas ni hurianta naung marujung ngolu di bagasan na sataon parhuriaon on: (laos dijahahon ma goar goarna...) (...Nama tertera dalam warta...)

Pdt : Nunga maradian nasida sian nasa ulaonna di portibi on. Alai nang pe ingkon ampe tu ganup jolma hamatean i, songon naung masa tu angka haholongan ni rohanta naung jumolo i. Dibagasan pangaramotion ni Debata do nang angka i saluhutna. Ai Kristus do Tuhan ni na mangolu dohot na mate.

H: Ingkon sude do jolma mamolus hamatean i. Nandang mardia imbar manang ise pe, na metmet nang na magodang, na mora nang na pogos, na sangap nang na lea, na gogo nang na gale.

Pdt : Didok di **Pangungkapon 20:12** "*Dung i huida ma angka naung mate i, angka na metmet nang angka na balga, jongjong di jolo ni habangsa i; jadi diungkap ma angka buku. Dung i diungkap ma sada buku na asing, i ma buku hangoluan, gabe diuhumi ma angka na mate i marguru tu na tarsurat di bagasan angka buku i, hombar tu na niulanasida be*"

Porsea do hita, TUHAN i do na manjou hita muse asa masipaidaan di lambung ni Tuhanta, **alani i rap jongjong ma hita huhut marende :**

(Jongjong)

H: (Marende Huria BE.No. 347 : 1 + 3 " Sai Masipaidaan" BL. 11

*♫♫♫ Sai masipaidaan do na porsea i
Dung sahat be langkana, tu hasonangan i
Tu hasonangan i, tu hasonangan i.*

*♫♫♫ Sai masipaidaan ma hita on muse
Di lambung ni Tuhanta; dung monang hita be
Dung monang hita be, dung monang hita be.*

Pdt: Antong tapuji ma Debata ala diparade di hita inganan na sonang, na andul ummuli jala dumenggan sian nasa na adong di hasiangan on, inganan na hot ro di saleleng ni lelengna. **(Hundul)**

16. Papungu Pelean Huhut Marende BE. HKBP No. 240 : 1 --- "O HAMUNA NA PORSEA" BL. 222 (Pelean Ia & Ib)

*♫♫♫ O hamuna na porsea, sai tong hamu mangalo jea
utian ni pangago i
Hata ni Debatamuna ma baen hamu sinjatamuna
ndang talu be hamu disi
Bisuk pe musu i, ditanda rohami, jou ma Jesus
Sai monang do baenonNa ho, alai musunta talu do.*

♫♫♫ Sai paia rohamuna, huhut sai alo hisapmuna

*ai halak Kristen do hamu
Sai papos ma rohamuna di Tuhan Jesus Rajamuna
ai urupanNa do hamu
Naeng suda pe gogom, sai tatap sambulom na di ginjang
Sonang disi tondinta i, dung sahat hita ro disi*

-----Musik-----

*♫♫♫ Ale Jesus pargogoi, ma nasa jolma sioloi
Hatam di hasiangan on
Paimbaru rohanami, huhut papir ma tondinami
ai na gale do hami on
Tu rohanami be, pasaor ma TondiMi Na badia
Sai burju be, di Ho sude, mangolu manang mate pe.*

17. J A M I T A : Daniel 7 : 9 - 14

18. Papungu Pelean Huhut Marende BE. HKBP No. 251 : 1 --- “NA MONANG I DO ” BL. 138 (Pelean II)

*♫♫♫ Na monang i do na muse manganhon, parbue ni hau hangoluan i
Ndang jadi idaonna hamagaoan, nang hamatean paduahon i
Ai Debatana papos rohana, mambaen langkana tongtong tiur
Mambaen langkana tongtong tiur.*

*♫♫♫ Na monang i ndang tupa hahuaon, ni hamatean paduahon i
Sai jongjong do ibana maradophon, bohingKu di banuaginjang i
Sai idaonna disi Tuhanna ro di donganna na monang i
Ro di donganna na monang i.*

-----Musik-----

*♫♫♫ Na monang i do lehononhu mangan, di surgo manna na buni dope
Pangalahona do tongtong ingoton, margoar na imbaru do muse
Na sinurathon tu batu intan tongtong martua panjalo i
Tongtong martua panjalo i.*

*♫♫♫ Na monang i marnida pambaenanHu, i do na marmahani bangso i
PasahatonHu deba sahalangKu, tu tangan ni sude na monang i
Sai rosahanna muse alona patunduhonna do musungKi
Patunduhonna do musungKi.*

-----Musik-----

*♫♫♫ Na monang i do na manjalo ulos, na saksak di banuaginjang i
Goarna i do na so jadi mosos, sian pustaha hangoluan i*

*TaringotanHu di DebatangKu, sude donganHu na monang i
Sude donganHu na monang i.*

♪♪ Na monang i do ingkon gabe tiang, di bagas joro ni DebatangKi
Di bagas i tongtong ibana mian, jumujung goar ni Jahowa i
UhirhononHu tusi goarHu, sijujungonHu di surgo i
SijujungonHu di surgo i.

-----Musik-----

♪♪ Na monang i do hundul raphon Ahu di habangsangKu na di surgo i
Tudoshon Au di lambung ni AmangHu, partohap do di hasonangan i
Na maradian di hasonangan sude na monang na burju i
Sude na monang na burju i.

♪♪ Urupi au o Jesus asa monang au maralohon angka musungki
Portibi on, sibolis, nang pamatang do na manaiti au tu dosa i
Pasangaphonhu tongtong goarMu di ingananhu di surgo i
Di ingananhu di surgo i.

19. Tangiang Pelean – Tangiang Ale Amanami - Tangiang Pasupasu :